

# Parnaarunneqartussanngorluni eqqartuussaanerup naammassineqarneranut paasissutissat

Uani quppersakkami atuarsinnaavatit parnaarunneqartussanngorluni eqqartuussaanerup naammassineqarnerani maleruagassat pingaarnerit. Sukumiinerusunik/annertunerusumik paasisaqarusukkuut sulisunit atorsinnaavatit maleruagassiat inatsisillu. Aamma sunulluunniit tunngatillugu nalornisuussaguit tamatigut sulisut aperiinnarsinnaavatit.

### **1. Parnaarussivik imaluunniit isertitsivik?**

Parnaarunneqartussanngorluni eqqartuussaagaanni amerlanertigut parnaarussivimiittussanngortoqartarpoq.

Parnaarussaannissannulli piffissaliussaq sivikitsuinnaappat imaluunniit pissutsit allat pisariaqalersissappasuk imaassinnaavoq isertitsiviit ilaanni imaluunniit Københavnip Parnaarussiviini ("Vestre Fængsel"-imi) parnaarunneqartutit. Taakkunaniinnermi maleruagassiat amerlasuutigut parnaarussivinni matoqqasuni maleruagassiat assigaat, takuuk ataani allatat.

### **2. Parnaarussivimmi ammasumi imaluunniit matoqqasumi?**

Parnaarunneqartussanngorluni pillagaaneq amerlanertigut parnaarussivimmi ammasumi naammassineqartarpoq. Taamaakkaluartoq Kriminalforsorgip Pisorta qarfiata aalajangersarsinnaavaa pillagaaneq parnaarussivimmi matoqqasumi naammassineqassasoq, soorlu sivismik parnaarussassanngorlutit pillagaasimaguit.

Parnaarussivimmi matoqqasumi sulisut amerlanerusarput nakkutilliinerlu annertunerusarluni parnaarussivinni ammasuninngarnit. Parnaarussivimmi matoqqasumi maleruagassat aamma sakkortunerusarput, soorlu aningaasaatit, oqarasuaasersorsinnaaneq, pulaartoqarsinnaaneq aammalu aneertinneqarsinnaaneq eqqarsaatigalugit. Tamakku pillugit ataani allatat takukkit.

### **3. Immikkoortut killilikkamik ammasut**

Pisuni aalajangersimasuni parnaarussivimmi ammasumi immikkoortumut killilikkamik ammasumut, parnaarussivinnut matoqqasunuunngitsoq, inissineqassaatit. Immikkoortuni killilimmik ammasuni malittarisassat sukannerusarput parnaarussiviup ammasup immikkoortuini sinnerinngarnit. Killilikkamik ammasunngorlugit immikkoortortat pillugit sulisut sukumiinerusumik paasiniaaffigisinnaavatit.

### **4. Parnaarussivimmut matoqqasumut nuutsitaaneq**

Parnaarussivimmi ammasumi oqinnerusumik periarfissaqartitaanerit atornerlukkukku naatsorsuutigisinnaavat parnaarussivimmut matoqqasumut nuutsitaasinnaanerit. Taamatut pisoqartarpoq soorlu illit parnaarussivik qimakkukku akuersissummik tunineqarsimanak, ikiaroorntunik imaluunniit imigassanik aalakoornartunik parnaarussivimmut anngiortumik eqqussisimaguit imaluunniit tamakkuninnga atornerluiguit, qunusaariguit imaluunniit annersaaguit, imaluunniit allamik inatsisaatsulioruit parnaarussivimmi aammalumi avataani.

Sulisut aperisinnaavatit kingusinnerusukkut parnaarussivimmut ammasumut inisseqqinneqarsinnaaninnut qanoq periarfissaqartinneqarnerlutit.

### **5. Pillagaanerup sivismisusilerneru**

Eqqartuussaanerit naammasseriarpit, imaluunniit parnaarussivimmut inissineqareeriaruit, pillagaanerpit qanoq sivismisutiginissaa naatsorsorneqartarpoq. Taamaalisoqarneratigut paasitinneqassaatit pillaatisiavit naammassineqarnerani piffissaliussat qanoq ittuunerinik, soorlu pillagaanerit ulloq suna naassanersoq, tassa eqqartuussineq malillugu ulloq suna iperagaasussanngortitaanersutit. Taakkulu saniatigut paasitinneqassaatit ulloq suna anguneqariarpit immaqa aneersinnaatitaalersinnaasutit aammalu ulloq suna misiligutigalugu iperagaagallarneqarsinnaalissanersutit.

Pillagaaninnik naatsorsuinerup inerneru akuerisinnaasorinngikkukku maleruagassiat malillugit maalaaruteqarsinnaavutit, takuuk uani Maalaarutit pillugit immikkoortoq. Eqqartuussaanerpit inerneranik naliliineq isumaqatigisinnaanngikkukku piumasarisinnaavat pillagaanerpit qanoq sivismisutiginissaanik naatsorsuineq eqqartuussivimmut saqqummiunneqassasoq.

## 6. Inussioqatigiinneq

Parnaarussivinniinnerup nalaani amerlanertigut parnaarussaqaatitit suleqatigalugillu sunngiffimmi qanimut inooqatigisussaavatit inussioqatigalugit. Parnaarussiviit amerlanersaanni illit ineeqqanni/inigisanni kisimiissinnaavutit sunngiffinni aamma unnuakkut. Parnaarussiviit ilaanni aamma periarfissiisoqartarpoq pillagaanerup naammassiniarnera parnaarussaaqaatit peqatiginngivillugit naammassiniassallugu. Pisuni aalajangersimasuni illit allanik inussioqateqarnissat ilinnut inerteqqutigineqarsinnaavoq ("inussioqatigiissinnaatitaanermit mattussaaneq").

Isertitsivinni kiisalu Københavnimi Parnaarussivinni inussioqatigiissinnaaneq killilersugaaneruserpoq.

Parnaarussanut 18-it inorlugit ukiulinnut inussioqatigiissinnaanermut maleruagassiat immikkut ittut atuupput. Sulisut aperisinnaavatit pisariaqartissagukku.

## 7. Inummut, isumaginninnikkut aammalu inatsisinut tunngasutigut ikiorsiineq

Pillagaanerpit nalaani amerlanerpaatigut immikkoortoqarfimmi inissineqarfigisimasanni sulisunit ikiorneqarlutillu siunnersorneqarsinnaavutit. Aamma immikkoortoqarfimmi sulisut kiisalu parnaarussivimmi isumaginninnermut siunnersorti (socialrådgiver-i) oqaloqatigisinnaavatit illit ilaqtavillumu inuttut isumaginninnermullu tunngasutigut ajornartorsiutisi pillugit.

Parnaarussivimmut imaluunniit isertitsivimmut anngunneqariaruit ilitersorneqassaait suut illit pisinnaatitaaffigissaneritit, suut pisussaaffigisussaaneritit kiisalu pissutsit allat parnaarussivimmiinninni atugassarititaasut pillugit. Parnaarunneqarninnit isertitsivimmiilerninniilluunniit sapaatip-akunnera qaangiutsinnagu, illit illillu parnaarunneqarfiit parnaarunneqarninni iperagaariiginnarlutillu sammisassannik peqatigiillusi pilersarusiussaasi.

Immikkut ittumik ikiorneqarnissamik pisariaqartitsissaguit parnaarussivimmi/isertitsivimmi palasi, napparsimasunik paarsisoq ("niviarsiaq"), nakorsaq, kigutinut nakorsaq, ilinniartitsisoq aamma parnaarunneqarfinilu qullersat saaffigisinnaavatit. Eqqartuussaannut attuumassuteqartunik apeqqutissaqaruit ilinnik illersuisoq saaffigisinnaavat. Sulisut aamma innersuussinnaavaatsit inatsisilerituunut tamanut ammasumik ikiorsiisartunut.

## 8. Pigisat aningaasallu

Ineeqqanni pequteqarpoq, oqoruteqarpoq qaleqarlunilu, allaruteqarpoq sulliseqarlunilu. Aamma killilimmik periarfissaqarputit annikkikalumik nammineq pigisannik nassataqarnissannut, soorlu atisat assiutillu.

Pigisat suut nassarsinnaaneritit pillugit assigiingitsunik maleruagassiaqartarpoq apeqqutaalluni parnaarussivik matoqqasumiissanersutit, ammasumiissanersutit imaluunniit isertitsivimmiissanersutit.

Pisariaqarfiani sulisut aperisinnaavatit pigisatit aningaasallu nassiunneqarsimasut ilinnut tunniunneqarsinnaanersut, imaluunniit qinnuteqarsinnaavutit illit pigisatit aningaasaatitillu parnaarussivimmiit avammut nassiunnarlugit. Allatut pisoqartinnagu parnaarussivik matoqqasumiit aningaasanik nassiussisoqarsinnaanngilaq, taamaallaalli sulinermi akissarsiat nassiunneqarsinnaasarlutik.

Parnaarussaaqqanerpit nalaani pigisatit aserorpata, aserorneqarpata tillinneqarpataluunniit tamatigorluinnangajak parnaarussivik akisussaatinneqarsinnaanngilaq.

## 9. Nerisat/imeruersaatit il.il..

Parnaarussivimmiinnissamik pillaatissinneqarsimaguit nerisassarsiniutissannik tunineqartassaait namminerlu nerisassarsiniarsinnaasassallutit. Isertitsivinni igariikkanik

nerisassinneqartassaait. Peqqinnissaq pillugu nakorsap peqqusineratigut immikkut akuukkanik nerisassiisoqarsinnaavoq. Naatitaannarnik nerisuuguit imaluunniit upperisat patsisigalugu immikkut sanaanik nerisaqartariaqaruit tamakku tunngavigalugit nerisassiisoqartassaaq. Pisariaqartikkukku inissinneqarfinni sulisut imaluunniit palasi aperisinnaavatit.

Kaffit tupat allallu pisariaqartitat parnaarussivinni isertitsivinniluunniit pisiarinqarsinnaasarput. Inissiivik apeqqutaatillugu pisiarinqarsinnaasut assigiinngissinnaasarput.

## 10. Pujortarneq

Parnaarussivinni, ammasuni isertitsivinniluunniit danskit Kriminalforsorgiata ataaniittuni tamani illup iluani pujortarneq inerteqqutaavoq. Silami pujortarsinnaavutit. Pujortarnermut malittarisassiat Kriminalforsorgeqarfinni tamatumalu ataaniittuni allanngorarsinnaapput.

Tupat, cigarettit pujortarnermullu atortut allat - soorlu pujortaait, filterit imusiviillu sikaavimmi parnaartartumi ineeqqavit silataaniittumiitinneqartassapput. Sikaavik parnaaqqajuannassaaq, illillu matuersaat tigummisassavat. Tupamik pujortarnermulluunniit atortunik allanik ineeqqanniititaqarsinnaanngilatit.

Malittarisassanik unioqutitsineq pillagaanermik kinguneqartassaaq.

Pujortarunnaarusukkuit, sulisut aperikkat pujortarunnaarniartunut akeqanngitsumik peqataasinnaansutit.

## 11. Sulineq ilinniagaqarnerlu

Pillagaanerit parnaarussivimmi naammassiniartillugu pisinnaatitaallutillu pisussaataavutit sulissallutit, ilinniagaqassallutit imaluunniit allamik akuerisamik ingerlataqassallutit, tassungattaq ilaavoq katsorsarneqarneq. Suliguit annikitsumik akissarsiaqartinneqassaait. Napparsimaguit nakorsallu sulisinnaanngitsutut nalunaarutigippatit napparsimansiuteqassaait.

Pillagaanerit isertitsivimmi naammassiniarneqarpat sulisinnaatitaassaait pisussaaffiginaguli.

Suliassatut ilinniarsinnaasutullu neqeroorutit inissiivimmiit inissiivimmut allanngorarpur, aammalu isertitsivinni killilersugaanerullutik. Parnaarussivimmiikkuit amerlanertigut sulliveqarfinni tunisassialioqataasinnaavutit, nunalerinermik orpippassualerinemillu sammisaqarsinnaallutit, aammalu eqqiaanermik kiisalu illutanik aserfallatsaaliinermik suliaqarsinnaallutit imaluunniit inissiiviup eqqaanik saliillutillu piorsaaqataasinnaallutit. Isertitsivimmiikkuit amerlanertigut taamaallaat neqeroorutigineqartarput pisariunngitsunik tunisassialioqataaneq aammalu illutanik aserfallatsaaleeqataaneq.

Ilinniartitaaneq parnaarussiviup atuarfittaani ingerlanneqartarpoq, imalluunniit isertitsivimmiikkaanni avataaneersunit ilinniartitsisunit ingerlanneqartarluni, ilinniartitsissutigineqartullu amerlanerit tassaasarput inersimasunut atuartitsineq nalinginnaasoq imaluunniit immikkut atuartitsineq.

Illit kissaatitit pikkoriffigisatillumi sapinngisaq tamaat isiginiarneqassapput. Periarfigisinnaasatit pillugit sulisut aperisinnaavatit.

Pissutissaqarluarpat immikkut akuerineqarlutit parnaarussiviup avataani sulisinnaatitaassaait ilinniarsinnaatitaallutilluunniit ("frigang"-eqarlutit) imaluunniit aamma suliffiviit parnaarussivimmiit isumagisinnaassallugu. Taamatut frigang-eqarlutit sulininnut akissarsiaqaruit amerlanertigut inissiivimmiititaaninnut akiliisassaait. Tamakku pillugit sulisunit paasitinneqarnerusinnaavutit.

## 12. Katsorsarneqarneq

Immikkut pisariaqartitsissaguit katsorsarneqassallutit ilaatigut periarfissinneqarsinnaavutit danskit Kriminalforsorgiata inissiisarfiutaasa avataanniittumut inissinneqarlutit pillagaanerit naammassiniassallugu. Taamatulli aqqisoqarsinnaangippat danskit Kriminalforsorgiannit neqeroorutigineqarsinnaapput katsorsaariaatsit assigiinngitsut immaqa atorsinnaasatit, soorlu imigassamik imaluunniit ikiaroonartunik atornerluisuuguit, imaluunniit pinguttaasimasutut imaluunniit kinguaassiuutitigut atornerluisimasutut eqqartuussaasimaguit. Danskit Kriminalforsorgiannit saqqummersinneqarsimapput quppersakkat immikkut ittut katsorsarneqarsinnaaneq assigisaalu pillugit paasissutissartallit. Pisariaqartissagukku sulisunut paasiniaasinnaavutit.

## 13. Sunngiffimmi

Allatut pisoqartinnagu pisinnaatitaavutit ullormut minnerpaamik nal.ak. -ni ataatsimi silamiinnissannut ("silaannarissarneq").

Periarfissaqarputit radiomik tusarnaarnissamut, TV-mik isiginnaarnissamut avisinillu atuarnissamut. Pisariaqartissagukku sulisut aperikkat radiomik TV-millu atorniarsinnaanermut qanoq periarfissinneqarsimanersutit, kiisalu atuagassianik, avisinik assigisaannillu atorsinnaanersutit pisinnaanersutilluunniit.

Sunngiffimmi neqeroorutit amerlanerusarput parnaarussivinni ammasuniilluni, isertitsivinniikkaannili ikinnerusaqalutik. Parnaarussivinni neqeroorutigineqartarput timersorneq, timigissarneq, nuannarisanik assigiingitsunik sammisaqarsinnaaneq assigisaallu. Pisariaqartissagukku sulisut aperikkat.

## 14. Upperisarsiorneq

Parnaarussivinni isertitsiviillumi ilaanni naalagartitsisoqartarpoq. Pisinnaatitaavutit upperisarsiorinnut atatillugu palasinnik assigisaanilluunniit oqaloqateqarnissannut. Parnaarussivimmi palasip Ilagiit Qallunaaneersup saniatigut inissiiviit ilaannut aalajangersimasunik attaveqartitsisoqartarpoq ilagiinnit allaneersunik, soorlu muuamaakkormiut imam-iinik kiisalu Ilagiit Katuullineersunik. Parnaarussivimmi palasip imaluunniit sulisut pisariaqartissagukku isumagisinnaavaat avataaneersumik palasimik imaluunniit upperisarsioqatinnik allamik palasitut pisinnaasumik oqaloqateqarnissat.

Upperisat malillugu ulluni aalajangersimasuni attugaqaqquusaassanngikkuit, suliffimmiinnissat tamakku najoqqutaralugit aqqissorneqassaaq.

## 15. Napparsimaneq

Parnaarussivik/isertitsivik aalajangersimasumik nakorsaqqarpoq. Parnaarunneqareeriaruit nakorsamik imaluunniit napparsimasunik paarsisumik ("niviarsiaq"-mik) oqaloqateqarnissannik neqeroorfigineqassaatit. Isumaqqaruit nakorsiartariaqarlutit sulisut tamatuminna paasitissavatit taakkulu nakorsaq/napparsimasunik paarsisoq attavigissavaat.

Nakorsap nalilertussaavaa katsorsartariaqarnersutit, katsorsarneqarnerillu danskit Kriminalforsorgiata katsorsaaviini imaluunniit napparsimmavimmi nalinginnarmi ingerlanneqassanersoq.

## 16. Kigutileritinneq

Kigutileritinnerit ilaannik suliaritinnissannut pisinnaatitaavutit. Taamatut suliaritinnerit ilaat nammeneq akilertussaavatit. Pisariaqartikkukku sulisut aperikkat.

## 17. Pulaartut

Pisinnaatitaavutit sap.ak. ataatsimi sivikkinnerpaamik nal.ak. ataatsimik sivilutigisumik pulaarteqarnissannut, sapinngisarli tamaat sap.ak.-nut nal.ak. marlunnik sivilutigitinniarneqartassalluni. Parnaarussivinniikkaanni amerlanertigut sulik akulikinnerusumik sivilunerusumillu pulaarteqartoqarsinnaasarpoq. Pulaartussatit amerlanertigut siumut akuerineqareersimasartussaapput.

Pulaarteqartut amerlanertigut sulisunit nakkutigalugit alakkarterneqarneq ajorput. Pisinnaatitaavutit alakkarterneqarnak illersuisunnit pulaarteqarnissannut, taanna parnaarunneqarninnut patsisaasunut illersuisuuppat, imaluunniit illersussappatit inatsisaatsuliornermut unnerluutigineqaatinnut. Taamatuttaaq pisinnaatitsisoqarpoq inatsisilerituut allat eqqartuussivinniit illersuisussatut toqqarneqarsimasut eqqarsaatigalugit.

Ilinnut pulaarsinnaasunik ilaqutaqanngikkuit ikinnguteqanngikkuilluunniit sulisut aperisinnaavatit qanoq periarfissaqartinneqarnersutit ilinnut pulaartartussamik toqqaasoqarnissanut.

Amerlanertigut periarfissaqarputit tusagassiortunit pulaarneqarnissannut. Apersorneqassaguit danskit Kriminalforsorgiat tamatumunnga akuserseqqaartussaavoq.

## 18. Oqarasuaasersornerit

Parnaarussivinni ammasuni oqarasuaammik angallattakkamik iikkamut atasumik attartortoqarsinnaavoq, taamaattumillu taamaallaat ineqqanni atorneqarsinnaavoq. Aamma oqarasuaatit aningaasanik nakkartitsivillit imaluunniit siumut akilikkanik manguttagaqarluni (kort-eqarluni) atorneqarsinnaasut parnaarussanit atorneqarsinnaapput. Parnaarussivinni matoqqasuni isertitsivinnilu taamaallaat oqarasuaasersorsinnaatitaassaait, immikkut ittumik akuerineqarsimaguit. Oqarasuaasersornitit amerlanertigut nammineq akilertussaavatit. Sulisut oqaluunniakkannut siarngutissavaatsit amerlanertigullu oqaloqatigiinnersi tusarnaassallugu. Parnaarussivinni matoqqasuni aammalu Københavnimi Parnaarussivinni immikkut aqqissuisoqarnikuvoq oqarasuaatit manguttagaqarluni (kort-eqarluni) atortakkat pillugit. Tamanna pillugu sulisut sukumiinerusumik oqaluttuussinnaassavaatsit.

Parnaarussivinni oqarasuaatinik angallattakkanik peqarsinnaaneq inerteqqutaavoq. Parnaarussivinni matoqqasuni aammalu isertitsivinni oqarasuaammik angallattakkamik eqqussineq pillaaitsissutigineqarsinnaavoq. Aamma ikinngutivit ilaqtavilluunniit parnaarussivinni matoqqasumiittutit imaluunniit isertitsivimmiittutit pulaarlutit oqarasuaammik angallattakkamik eqqussigunik pillaaitsissutigisinnaavaat.

## 19. Allakkat

Allagarsiatit amerlanertigut atuarneqaaqaassanngillat aatsaalli taamaaliortoqassalluni pisariaqarsorinarsippat eqqortumik iliornissaq isumannaallisaanissarlunniit eqqartassatigalugit, imaluunniit aamma pinerluuteqarninnik misillertitaasoq (eqqugaasoq) illersorniarneqartariaqalissappat. Patsisit tamakkuttaaq tunngavigalugit aamma allakkat tunniunneqaratillu nassiunneqanngitsoorsinnaapput.

Allagarsiassatit amerlanertigut illit najuutsillutit isigitillutillu ammarneqassapput puuatalu imai misissorneqassallutik. Parnaarussivinni matoqqasunit isertitsivinniillu allakkat nassiunniakkatit ingerlateqqinnginneranni misissoqqaarneqartarput. Parnaarussivinni ammasunit allakkat nassiunniakkatit ingerlateqqinneqartarput amerlanertigut misissoqqaarnagit.

Sulisut ammartersinnaangilaat ilinnut allakkat ukuninnga pisortaqarfinneersut, soorluttaaq illit taakkununga allakkatit misissoqqaarneqartussaanningsut: Inatsiseqartitsinermit ministeri, Kriminalforsorgimi direktøri, eqqartuussiviit, Eqqartuussivik Immikkut Maalaartarfik, Procesbevillingsnævn-i (Eqqartuunneqaatip Eqqartuussivimmi Qaffasinnerusumi nalileqqinneqarsinnaaneranut Akuersisartut), unnerluussisut, politiit, Folketingip Ombudsmand-ia,

Folketingimi ilaasortat, pisorta qarfiit allat, Europami Inuit Pisinnaatitaaffii pillugit Eqqartuussivik, Inunnik Anniartitsinerit Pillugit Europami Ataatsimiititaliaq, FN-ip (Naalagaaffiit Peqatigiit) Inuit Pisinnaatitaaffii Pillugit Ataatsimiititaliaa, FN-ip Inunnik Anniartitsinerit pillugit Ataatsimiititaliaa, unnerluutigineqarninni imaluunniit suliami ingerlasumi illersortit, taakkununga ilaallutik tigummineqarallartussanngortitaanerniit misiligutaasumik iperagaasinnaanernut suliaq. Taamatut aalajangiineq aamma atuuppoq allakkuit imaluunniit allagarsiguit inatsisilerituunit illersuisuusussatut pisortanit toqqarneqarsimasunit. Allakkalli taamaattut qinnguarterlugit misissorneqarsinnaapput, anngiortumik eqqussiniartoqarsinnaanera pinngitsaaliorniartulugu.

Allanneq eqarigukku sulisunut tamanna oqaatigisariaqarpat, taamaalioruimmi ikiorsinnaavaatsit soorlu båndimut immiussivimmik pissarsissullutit imaluunniit oqarasuaasorsorsinnaanerit annertusitillugu.

## **20. Allakkat digitaliusut - oqartussaasunit allagarsiat**

Parnaarussat amerlanersaat internetersinnaatitaanngillat taamaattumillu allagarsiaminnik digitaliusunik alakkaasinnaanatik. Illit internetersinnaatitaanngikkuit digitaliusunik allagarsisarunnaarumasinnaavutit, paarlattuanillu oqartussaasunit allakkatigut allagarsalissaatit. Aamma aalajangersinnaavutit ilaqtutat allakkatigut oqartussaassusilersinnaavat internetikkut allagarsiannik digitaliusunik alakkaasarnissamut. Paasisaqarnerujumallutit sulisunut saaffiginnigit.

## **21. NemID**

Danskit Kriminalforsorgianni sulisuinit parnaarussanut isertitsivinniittunut, parnaarussanut inissiigallartarfinniittunulluunniit tunniunneqarsinnaapput. Parnaarussat NemID-minnik atuisinnaapput parnaarussivimmi inissiigallartarfimiluunniit internetersinnaatitaagunik. Aamma aneernerminni iperagaareernerminniluunniit NemID-tik atorsinnaavaat.

## **22. Qinersinerit assingilu**

Pisinnaatitaavutit folketingimut kommuninut il. il. allakkatigut qinersinissamut. Aammattaaq pisinnaatitaavutit politikikkut ingerlatsinerni allani inatsisaatsuliorfiunngitsuni ingerlatseqataanissannut.

## **23. Oqaaseqartartut il.il.**

Inissiivimmi atugarisat nalinginnaasut pillugit parnaarussat aalajangeeqataanissaminnut pisinnaatitaapput. Tamanna pisinnaavoq parnaarussat oqaaseqartatussatut toqqagaat aqutigalugit.

## **24. Aneersinnaatitaaneq**

Parnaarussivinni ammasuni inissinneqarsimasut amerlanersaat sap.ak. pingasut allortarlugit pingajuata naanerani parnaarussivimmit aneersinnaatitaasarput ("orlov"/"sulinngiffeqarneq"). Parnaarussaannerit ullut 30-t qaangiutereeriarpata aatsaat aneersinnaatitaanerit atuutilersinnaavoq, ilanneeriarlunili, assersuutigalugu sivirusumik pineqaatissinneqarninni, suli sivirusunerungaatsiarneriqisumik utaqqisariaqarsinnaavutit.

Aamma periarfissiisoqartarpoq aneersinnaatitaanermik parnaarussivinnit matoqqasunit, tamannali parnaarussivinnut ammasunut naleqqiullugu taama pilertortigisumik pineq ajornaqaaq. Pisariaqartissagukku sulisut aperikkat.

Aneersinnaatitaanerit atonerlukkukku, soorlu uteqqinngitsooruit, ikiaroorartunik imaluunniit imigassanik anngiortumik eqqusseriaruit, imaluunniit aneernerpit nalaani nutaamik pinerluttulioruit, ilinnut aneersinnaatitaanermut akuersissut arsaarinnissutigineqarsinnaavoq. Akuersissut aamma arsaarinnissutigineqarsinnaavoq soorlu parnaarussiviup iluani ikiaroorartunik

atornerluillutillu, peqarlutillu tuniniaasaruit.

Parnaarussivik ammasumiillutit taamaalioruit ilimagisinnaavattaaq parnaarussivik matoqqasumut nuutsitaanissat.

Parnaarussatut periarfissaqarputit aalajangersimasunik pisassaqaqfinni aneersinnaanermut, soorlu qanigisavit ilaat perululluni napparsimalerpat imaluunniit toquppat.

Aneersinnaanermut akuersissummik taamaattumik piniarnerit tamarmik aalangersimasumik aamma akuerineqarsinnaasumik tunngaveqartariaqarput akuersisoqarsinnaallunilu aatsaat atornerlunneqannginnissaanut qularutissaqanngikkaangat. Annersinnaatitaaneq ilaatigut paarsisuliilluni pisarpoq.

## **25. Misiligummik iperagaaneq**

Parnaarussat amerlanertigut misiligummik iperagaasarpit eqqartuussissummi piffissaliutaasup 2/3-ia naammassineqaraangat. Sivikinnerpaamilli qaammatini marlunni parnaarussaareersimasariaqarputit misiligummik iperagaassaguit.

Ilaanni misiligummik iperagaasinnaavutit eqqartuunneqaravit sivisussuliissutit affaata 2/3-atalu akornanniittoq naammassigaangakku. Taama aalajangiisoqarsinnaasarpoq soorlu parnaarussaaneqaruit nalaani pimoorullugu tamaviaaruteqarsimaguit nutaamik pinerluttuliornissat ingalasimaniarniarlugu, assersuutigalugu ikiaroorntartutortarnerit imaluunniit imigassamik atornerluisuunerit katsorsarneqaatigigukku. Pisariaqartissagukku tamakku pillugit sulisut aperikkat.

Inuuneq naallugu parnaarunneqartussanngorlugit eqqartuunneqartut misiligummik iperagaanissaminut periarfissaqalersinnaapput sivikinnerpaamik ukiuni 12-ini parnaarussaasimareeraangamik.

Parnaarussiviup imaluunniit Inatsiseqartitsinermit ministeriaqarfiup (Kriminalforsorgip Pisortaqaqfia) aalajangiiffigisarpaa misiligutigalugu iperagaasinnaanersutit. Isumaqaqarunik misiligummik iperagaanissat unnersuutigineqarsinnaanngitsoq aarlerigigamikku nutaamik pinerluuteqarnissat, misiligummik iperagaanissat itigartitsissutigisinnaavaat.

Misiligummik iperagaasoqaraangat misiliinerup qanoq sivisussulernissaa aalajangerneqartarpoq. Misiligummik iperagaaneqaruit atuunnerani nutaamik pinerluuteqaruit parnaarussassanngortitaaneqaruit sinnera amerlanertigut pillaatisiavit nutaap qaavanut tapiliunneqassaaq.

Ilaatigut misiligutaasumik iperagaasinnaavutit danskit Kriminalforsorgiata nakkutigineqarnissannut piunasaqaatai aatsaat malinneqarsinnaagaangata. Aamma ilaatigut immikkut ittunik piunasaqaateqartoqarsinnaavoq soorlu imigassamik atornerluininnik katsorsarneqarnissannik Piunasaqaatit taamaattut unioqqutikkukkat danskit Kriminalforsorgiannit aalajangiunneqarsinnaavoq parnaarussivimmut utertinneqassasutit (iserteqqinneqassasutit).

## **26. Pinerlerneqarsimasumik ilisimatitsineq**

Inummut ingasattumik pinerluttuliorsimasutit eqqartuussaasimaguit kinguaassiuutitigulluunniit naapertuilluannigitsuliorsimallutit pillaatisinissavit tungaanut tigummigallagassanngortinneqarsimaguit pinerlikkat pisuni taagorneqalersuni ilisimatinneqarumasinnaavoq:

- Siullerpaamik nakkutigineqarnak aneertinneqaleruit
- Siullerpaamik nakkutigineqarnak aneertinnak pineqaatissinneqarnerit atorunnaarsinneqarallassappat
- Parnaarussiviup avataani nakkutigineqarnak aneersinnaaffinni inissinneqarsimallutit siullerpaamik nakkutigineqarnak aneernissamut akuerisaasimaguit



- Iperagaasimaguit
- Qimaasimaguit

Pinerlineqarsimasoq aamma nalunaarfigitikkusussinnaavoq pisuni makkunani:

- Radiokkut tv-kkulluunniit maluginiarnartutut aallakaatitamiikkuit
- Danskiteqarsimasoq arlaannit apersorneqarnerit allaaserineqarpat

Politiit aalajangissapput pinerlineqarsimasoq ilisimatinneqassanersoq.

Pinerlineqarsimasoq ilisimatinneqarumasinnaavoq aneernissannik akuerineqarnerit, iperagaanerit assingusumilluunniit pisoqarnera pillugu juulip aallaqqaataa 2011 sioqqullugu pinerluttuliorsimaguit. Tusagassiuutini takussaallutilluunniit tusarsaaguit ilisimatinneqarnissamik malittarisassiat atuutissapput qanga pinerluttuliorsimanerit apeqqutaatinnagu.

## **27. Maleruagassiat, iliuusereqqusat inerteqqutillu**

Pisinnaatitaavutit takussallugit danskiteqarsimasoq Kriminolforsorgiata Maleruagassiaani aammalu Europami Parnaarussiviit Maleruagassiaanni qanoq allasimasoqartoq, kiisalu aamma parnaarussivimmi isertitsivimmilu qanoq ittunik immikkut maleruagassiaqartoqarnerisooq.

Imigassat ikiaroorartullu inerteqqutaapput. Taamaapputtaaq nakorsaatit nakorsamit tunniunneqarsimanngitsut.

Parnaarussivimmit/isertitsivimmit qimaagaanni pillaatissutaasarpooq.

Tamakku saniatigut maleruagassiat atuutut sulisullu unnersuussutaat naalanniartassavatit.

## **28. Naalannigitsuliortunut pillaatit il.il.**

Maleruagassiat unioqqutikkukkit naalannigitsuliortutut pillaatissisaatit, soorlu mianersoqqussummik tunineqarlutit, akiliisitaallutit imaluunniit pillaatit ineqqamiittussanngorlutit (mattussaallutit). Taama pillaaqarsinnaanik aalangiisoqartinnagu oqaaseqarnissannut pisinnaatitaavutit soorluttaaq pisinnaatitaasutit aalangiinerup sunik tunngavilersorneqarsimaneranik tusartinneqarnissannut. Pisut ilaanni aamma inussioqatigiinnernut ilaasinnaatitaajunnaarsinnaavutit ("inussioqatigiinnermit mattussaaneq"). Takuuk Maalaarutit.

## **29. Misissugaaneq**

Parnaarussivimmit/isertitsivimmit isertinneqarninni misissorneqarsinnaavutit (ujarlerfigineqarsinnaavutit). Ima paasisariaqarpoq sulisut misissussagaat nassataqarnerisutit parnaarussivimmi/isertitsivimmi pigineqaqqusaanngitsunik. Pisariaqarfiani tamataajarneqarsinnaavutit - aamma taamaaliorfigineqarnerit upperisannut akerliugaluarpalluunniit. Taama misissuisoqartarpoq inuttut sooqatinnit (arnat aarnanit - angutit angutinit).

Parnaarussivimmiinnerpit nalaani aamma misissuiffigineqarsinnaavutit, soorlu pulaarteqaleruit pulaarteqareeraangavillu. Upalungaarsimaniarneq pillugu aamma illit inigisat misissuiffigineqarsinnaavoq.

Aamma peqquneqarsinnaavutit quunnik misissugassamik tunniusseqqullutit, ikiaroorartutorsimanerisutit misissorniarlugu.

### **30. Pissaanermik atuineq il.il.**

Pisut ilaanni sulisut pisinnaatitaapput pissaanerminnik atuinissaminnut tassanilu upalungaarsaatit atorsinnaallugit. Sulisut ilaatigut atorsinnaavaat paagutseriaatsit assigiinngitsut imaluunniit parnaarsartunik paffequtsiusiillutik, anaatalersorlutik seqqartaatinilluunniit qasilitsunik atuillutik.

Pissaanermik atuinerit qanoq ikkaluartulluunniit tamarmik sukumiisumik nakkutigisaapput, atuiniaraannilu taamaaliulinnginnermi piumasaqaatit aalajangersimalluinnartut naammassineqarsimasariaqarput. Pissaanermik atuineq tamatigut sakkukinnerpaaq atorniartariaqarpoq angorusutaq piniarlugu. Takuuk Maalaarutit.

### **31. Tunngavissaqanngitsumik pineqarsimanermut taarsiiffigisaaneq**

Taarsiiffigineqarnissannut pisinnaatitaavutit, tunngavissaqanngitsumik parnaarussassanngortitaanerperit killinga qimmorlugu parnaarussaasimaguit, tunngavissaqanngitsumik inissinneqarsimaguit inimit killisiuisarfimmut, pillaatit ineeqqamut imaluunniit inimit isumannaallisakkamut imaluunniit tunngavissaqanngitsumik inussioqatigiisinaatitaanermit mattussaasimaguit. Allatut tunngavissaqanngitsumik pineqarsimaguit ilaatigut, tassa piumasaqaatit aalajangersimasut naammassineqarsinnaappata, taarsiiffigineqarsinnaavutit.

### **32. Ajutoornermut tunngatillugu taarsiiffigitinneq**

Pisinnaatitaavutit danskit Kriminalforsorgiata isertitsiviutaaniitillutit ajoquseruit taarsiiffigitissinnissamut. Sulininni sukisaarsaartilluunniit ajoqusersimaninnut tunngatillugu taarsiiffigitissinnaavutit. Aamma taarsiiffigitissinnaavutit, assersuutigalugu ajoquserninnut tunngatillugu isarussatit aserorpata.

### **33. Suliassamik isumaginninneq**

Nalinginnaasumik pisinnaatitaavutit oqaaseqarlutit saqqummiussinissannut illit pillutit suliaq naammassineqartinnagu. Itigartitsinerit aalajangiinerillu ilinnik tapersiinngitsut allatut pisoqartinnagu tunngavilersorneqartussaapput. Pisinnaatitaaffigaat aalajangiineq allaganngorlugu pissallugu. Aamma pisinnaatitaavutit, allattugaatinik qimerluuisinnaanermut aalajangersakkat nalinginnaasut malillugit, illit pillutit allattugaatit assilinerinik pinissannut oqaaseqarfigisinaallugillu aalajangiisoqannginnerani.

Ilaatigut pillagaanerup naammassiniarnerani inissiivimmu sorlermut inissiisoqarnissaanut tunngasut immikkut malittarisassaqarput, taamatuttaaq ippu inussioqatigiisinaanermi mattunneqarnissamik aalajangiinerit kiisalu danskit Kriminalforsorgiata inissiisarfiutaanit allamut nuutitsisarnerit. Sulianut tamakkununga tunngatillugu suliap pappialartaannik qimerluuisinnaaneq pisussaaffiginngilat, taamaattumillu aalajangiussamut tunngavilersuutinik tusartinneqarnissat killeqassaaq.

### **34. Maalaarutit**

*Danskit Kriminalforsorgiata aalajangigaannut tunngatillugu maalaaruteqarneq*  
Nalinginnaavoq danskit Kriminalforsorgiata aalajangigai pillugu Kriminalforsorgip immikkoortorta qarfiinut maalaaruteqarsinnaannginnerit. Makkuli pillugit aalajangikkat maalaarutigineqarsinnaapput:

- Inissinneqarneq nuutsinneqarnerlu
- Pillaatissiinerimi immikkoortup 78-ip ataanut inissinneqarneq

- Eqqartuussummik naatsorsuineq
- Parnaarussanik misissueqqissaarneq
- Ineeqqat pillaaftit killisiuffiillu
- Ineeqqamut matoqqasumut inissinneqarneq, paffequtinik saviminernik illersuutinillu allanik atuineq
- Pissaanermik atuineq
- Parnaarussanik inussioqateqarneq
- Allaqateqarneq
- Pulaarteqarneq, aamma meeqqannik tiggummigallaaqateqarnissamik itigartitaaneq
- Tusagassiutinut attaveqarsinnaatitaanerup killeqarpallaarnera
- Aneersinnaatitaaneq
- Arsaarinninneq
- Misiligummik iperagaaneq
- Misiligummik iperagaanermik atorunnaarsitsineq
- Singernikkut elektroniskiusumik qileruteqarluni pillaatissiamik atuinissamut akuersisummik atorunnaarsitsineq
- Pillaatitilluni tunngavissaqanngitsumik pineqarsimaneq pillugu taarsiiffigitinneq

Maalaarnissamut periarfissatit pillugit sukumiinerusunik paasissutissaqarpoq tiggummigallaanissamik nalunaarummi assigiinngitsullu ataasiakkaat pillugit nalunaarutini. Sulisut malittarisassianik eqqortunik nassaarnissannut ikiorsinnaavaatsit.

Aalajangikkamut aalajangersimasumut tunngatillugu maalaarsinnaatitaaguit sulisut tamanna pillugu paasissutissavaatsit. Aalajangikkat allattugaatigineqarpata maalaarnissamut periarfissatit aalajangikkamit takuneqarsinnaassapput.

Kriminalforsorgip immikkoortorta qarfiinut danskit Kriminalforsorgiannit aalajangikkat pillugit maalaaruteqarusukkuit, aalajangiunneqartumit qaammatit marluk qaangiutsinnagit taamaaliortariaqarputit.

#### *Kriminalforsorgip aalajangigai*

Suliat tamatumanga aalajangiiffigineqarsimasut aalajangersimasut eqqartuussisunukaassinnaavatit. Taamaaliorsinnaanerit aalajangikkanut makkununga atuuppoq:

- Eqqartuussisummik naatsorsuinermit tunngatillugu aalajangikkat
- Allakkanik tiggummigallaanermut tunngatillugu aalajangikkat ilaat
- Ineeqqami pillaaftit ullunit arfineq-marlunnit sivilisinerusumik pillaatissinissamik aalajangikkat
- Pigisanik aningaasanillunniit arsaarinninnissamik aalajangikkat ilaat
- Pisassavit akiligassanut ilanngullugit naatsorsorneqarnissaannik aalajangikkat ilaat
- Eqqartuussisutip piffissaliutaasup 2/3-ia naammassereerlugu inuunerluunniit naallugu eqqartuussutip ukiut 14-issaata kingorna misiligummik iperagaanissamik itigartitsineq
- Parnaarusseqqinnissamik aalajangikkat
- Tunngavissaqanngitsumik pineqarsimanermut taarsiiffiginninnissamik itigartitsinermit tunngatillugu aalajangikkanut tunngavigisat ilaat ilumuunngissorineqarpata

Aalajangikkamik eqqartuussisunut ingerlatitseqqinissamut qinigassannut tunngasunik paasissutissanik sukumiinerusunik pisinnaavutit Pillaatissiinermi iliuusissat allattorsimaffiini.

Immikkoortorta qarfimmit aalajangikkap eqqartuussisutigoortinneqarnissaa piumasarinnaagukku, aalajangigaq qanoq aalajangerneqarsimaneranik ilitsersuutitaqassaaq. Eqqartuussisunut aalajangigasseerusukkuit, aalajangiissummik paasitinneqarnissat sapaatip-akunnerinik sisamanik sioqqullugu tamanna piumasaqaatigisariaqarpat.

### *Folketingimi Ombudsmandi*

Danskit Kriminalforsorgiata aalajangiussaani inaarutaasumik Folketingimi Ombudsmandimut maalaaruteqarsinnaavutit. Ombudsmandi aalajangikkamik allannguisinnaanngilaq, ombudsmandilli oqartussaasut pineqartumik aalajangiisut qinnuigisinnaavai eqqarsaatigineqqeqqullugit. Nalinginnaasumik ombudsmandip piumasaqaataa eqqarsaatigineqartarpoq.

### **35. Inunnik nalunaarsuinermut inatsit**

Danskit Kriminalforsorgiata inissiisarfisa ilaanni parnaarunneqarsimaguit, paasisutissat ilinnut tunngasut qarasaasiat atorlugit katersorneqarlutillu suliarineqassapput.

Inunnik nalunaarsuinermut inatsit malillugu pisinnaatitaaffitit makku atorsinnaavatit:

Pisinnaatitaavutit paasisutissanik edb-kut suliarisassanngorlugit katersineq pillugu paasitinneqarnissamut:

- Pisinnaatitaavutit qinnutigissallugu paasisutissat suliarineqartut suunerinik paasitinneqarnissannik;
- Pisinnaatitaavutit piumasarissallugu paasisutissat iluarsineqassasut imaluunniit piarneqassasut mattunneqassasulluunniit, taakku kukkusuuppat paasinerluutaasinnaappata imaluunniit assigisaannik inatsit unioqqutillugu edb-kut suliarineqarsimappata

### **36. Immikkut nunat allamiunut**

#### ***Maleruagassiat***

Pillaatisiap naammassiniarnerani maleruagassiat pingaernerit tuluttoortut pigineqarput. Taakku sulisunit atorsinnaavatit.

#### ***Oqaatsinik ajornartorsiutit***

Amerlanertigut sulisut tuluttut imaluunniit tyskisut oqaloqatigisinnaassavaatsit. Oqaatsilli taakku saperukkit sulisut ilaasa imaluunniit parnaarussaqaativit ilaasa immaqa nutserussinnaassavaatsit.

Sulisut pisariaqarfiani ajornanngippallu avataaneersunik nutserisunik aggersaasinnaapput.

#### ***Oqaaseqartartoq***

Inissiiviit ilaanni immikkut toqqakkamik nunat allamiut oqaaseqartartoqartarput.

#### ***Aallartitaqarfiit il.il.***

Illit nunagisavit aallartitaqarfianut sinniisoqarfianulluunniit attaveqarnissannut periarfissaqarputit. Pisariaqartissagukku sulisut aperikkat.

#### ***Qinersinerit il.il.***

Pinerit ilaanni kommunenut il.il. qinarseqataasinnaavutit. Pisariaqartissagukku sulisut aperikkat.

#### ***Nunamut allamut nuutsinneqarneq pillaatisiaq naammassiniarlugu***

Pinerit ilaanni periarfissiisoqartarpoq nunagisami nunamiluunniit maanna najukkami pillaatisiamik naammassiniaanissamik. Nuutsinneqarnissamut periarfissaqartoqarsinnaavoq nuna nuutsinneqarfissat suunersoq pillaatisiassavillu sinneruttup sivisussusia apeqqutaallutik. Nalinginnaavoq pinerliisimasut nunagisaminnut nuutsinneqartarnerat. Pisuni aalajangersimasuni illit kissaatigisannut akerliusumik nuutsitaasinnaavutit. Paasisaqarnerujumallutit parnaarussivimmi naalagaasoq aperiuq.

### ***Misiligummik iperagaatilluni nunami allamiinneq***

Ilaannikkut pinerliisimasut misiligummik iperagaasut nunami allamiissinnaasarput (amerlanertigut nunami innuttaaffigisaminni). Pissutsit taakku atuutsillugit iperagaanissamut piumasaqaatit eqqortinneqarnissaannik qulakkeerinissamik akisussaasoq tassaassaaq nuna pineqartoq. Nunami allamiissinnaaninnut ilaatigut nuna maanna najukkat aalajangiisuusaaq. Paasisaqarnerorusukuit sulisut aperikkat.

### ***Nunamit anisitaaneq***

Eqqartuussivimmit aalajagerneqarsimappat iperagaallutillu nunamit anisitaassasutit, amerlanertigut parnaarussaannerit naammassiniassavat parnaarussivimmi matoqqasumi.

Nunamit anisitaassaguit misiligummik iperagaassaatit pillaatiasiassavit affaa naammassereerukku, parnaarussivimmiiginnarusunnertutit apeqquataatinagu. Politiit aalajangissavaat qanoq anisitaassanertutit, amerlanertigullumi iperagaasutillu nunamit anisinneqarnissat isumagisarpaat. Pisariaqarfiani anisitaanissannut tunngasunik nalorniffeqaruit sulisut imaluunniit inatsisileritooq illersuisut aperisinnaavatit.

### **37. Ilaquttanut paasissutissat**

Parnaarussamik pulaagaqarniaruit amerlanertigut inissiivimmut pulaarsinnaanermut akuersissummik siumut qinnuteqassaatit. Inissiivimmiit erseqqinnerusumik ilitersuutigineqassapput pulaarnermi maleruagassiat suunertut, tassungalu ilaatillugit pulaarfissamik inniminniineq. Maluginiaruk sulisut pulaarninni nassatannik atisannillu misissuinissaat akuersariaqarakku.

Maleruagassiaqarpoq qanoq annertutigisumik parnaarussat namminneq pigisaminnik aningaasaatiminnillu inissiivimmiititaqarsinnaanerannut. Inissiivimmi sukumiinerusumik ilitersorneqarsinnaavutit, parnaarussaq tunissuteqarfiginiarukku aningaasanilluunniit tuniniarukku.

Allakkat parnaarussamut nassiatutit amerlanertigut sulisunit atuarneqarneq ajorput, kisiannili amerlanertigut parnaarussaq isigitillugu ammarneqartarlutik anngiortumik eqqussiniartarnerit ingalassimaniarlugit. Pinerilli ilaanni parnaarussamut allakkatit atuarneqaaqsinnaapput.

Aamma taamatut allakkat ilaat (tigummineqaannarlutik) tunniukkumaneqanngissinnaapput. Amerlanertigut allakkat tamakku nassiussisumut utertinneqassapput, tamatigulli kingusinnerpaamik sap.ak. 4 qaangiuttullu nassiussisut paasitinneqassapput allagaat tigummineqaannarsimasut.

Parnaarussat aneersinnaatitaanerannut aammalu oqarasuaateqarsinnaatitaanerannut periarfissaliussat pillugit qulaaniittut takukkit.

Parnaarussivinni matoqqasuni isersitsivinnilu pulaaruit angallattakkamik oqarasuaateqarlutit taamaaliornerit pillaatissutiginnaavat.

### **38. Nipangiussisussaataaneq**

Parnaarussivinni, isertitsivinni aammalu Kriminalforsorgip susassaqarfiini sulisut tamarmik nipangiussisussaataaneq.

Parnaarussat pillugit paasissutissat ilaqaannut allanulluunniit avataaneersunut ingerlateqqeqqusaanngillat. Parnaarussap nammineerluni ilaqtanni, soorlu inuttut atukkani pillugit oqaluttuussinnaavai, sulisut taamaaliorinnaatillugit akuersereersimangikkuni.

### **39. Oqarasuaatikkut siunnersuineq**

Apequtissaqaruit danskit Kriminalforsorgianni inunnik isumaginninnermut siunnersorti (socialrådgiver) oqaloqatigisinnaavat aammalu malittarisassat pisinnaatitaaffiillu pillugit paasissutissanik pissarsisinnaallutit danskit Kriminalforsorgianni kinaanermik taasinani oqarasuaatikkut siunnersuisarfeqarfia attavigalugu, normua: oqar. 70 26 04 06.

Siunnersuisarfik ammasarpoq ulluinnarni nal.: 9.00-15.00 aamma 19.00-22.00.  
Sap.ak. naanerani siunnersuisarfik ammasarpoq nal.: 12.00-18.00.

Direktoratet for Kriminalforsorgen  
Strandgade 100  
DK 1401 Copenhagen K

Oqarasuaat 72 55 55 55

[www.kriminalforsorgen.dk](http://www.kriminalforsorgen.dk)  
[dfk@kriminalforsorgen.dk](mailto:dfk@kriminalforsorgen.dk)